



Apeqquteqaat aallaavigalugu oqallinnissamik siunnersuut, Aatsitassanut Inatsimmi aatsitassarsiorluni ingerlatseqatigiiffiit nunatsinni qallorneqartut suliareqqeqqaarlugit nunanut allanut anninneqarsinnaanerannik piunasaqarsinnaatitaaneq atuutiinnassava.

(Inatsisartunut ilaasortaq Peter Olsen, Inuit Ataqatigiit)

Aatsitassarsiorneq nunatsinni inuussutissarsiutini inerisagassaqqissut politikkikkullu taamak siammasissumik siunnerfigineqarnikuusup inerisarnissaa pitsaasunillu sinaakkuserneqarnissaa pisariaqarpoq.

Inuussutissarsiutini ineriartortitsinermit siullertut pingaarnertullu anguniagaajuassaaq inuiaat kalaallit iluaqutissinneqarlutik pissarsilluarnerpaajunissaat siunissamilu akornutigiligassaannik aaliangiisoqartassanngitsoq. Nunami manna inuiannit kalaallinik pigineqartoq, minguitsumik avatangiisilik uumassusilinnillu tunngaveqartumik inuuniarfiguarsimasarput kingulissatta pissaraat. Uagullu siulitsinnit kingornussimasarput kingulitta aamma misigisariaqarpaat. Uumassusilinnimmi inuuniuteqarneq ukiorpassuarni nunami maani aamma nappatissaraarput.

Aningaasarsiupallakkusuinnarluta kingornussisussatta artukkerneqannginnissaat ataatsimoorfigisigu. Ineriartorluarneq isumatuumik aaliangersinnaassuseqarnermit pitsaanngitsunillu kinguneqarsinnaasunik peqarpat naameersinnaassuseqarnermik aamma tunngaveqarmat. Tamattalu ineriartorneq piujuartitsinermit tunngavilik ullumikkut atukkagut aallaavigalugit minnerunngitsumillu siunissami akornutigiligassarinnngisatsinnik tunngavilik aallaaviguartigu.

Nunatsinni aatsitassarsiorneq tunngaveqartuartaqarpoq uagutsinnut aallaaviginermit. Oqaluttuarisaanitsinni ilisimatuussutsikkullu ukiuni kingullerni uppersarneqareerpoq taamaaliunngikkutta pisuussutigut uumaatsut iluaqutigingaarnaviannngikkigut.

Oqallisissiamik qaqitsisoq Inatsisartunut ilaasortaq Peter Olsen, Inuit Ataqatigiit qutsavigaarput apeqqummik imaattumik qaqitsimmat. Piffissaasuaannartariaqarpoq inatsisiliarisimasatta nalilersortuarneqarnissaat. Torrallannerusariaqakkagut aatsaat ammasumik, innuttaasunik

susassaqtunillu peqataatitsinikkut, atituumittaaq tunngavilimmik aaliangersaavigineqarnerisigut iluatsissinnaavagut.

Naalackersuisut aatsitassanut inatsit nalilersussallugu akissuteqaamminni oqariartuutigigaat Inuit Ataqtigiit maluginiarpaat. Nalilersuinissaq tikilluaqqarput apeqqutigerusullugulu innuttaasunik, susassaqtunik aaliangiisartunillu qanoq peqataatitsisoqarniarnersoq? Apeqqummimi taamak pingaaruteqartigisumi aappaagulu 2020-miit allannguisoqarniarnera pissasoq Naalackersuisut naqissusereersimammassuk pilersaarummik tigussaasumik tusarusunnarpoq. Pinngitsoortikkumallugu allannguiarnarup Naalackersuisut, innuttaasut, inuussutissarsiortut Inatsisartullu akornanni aporaassutaaleranilu avissaartuuffiulinnginnissaa.

Oqallisissiaq una iluatsillugu Naalackersuisut apererusunnarput, qaqaguuna 'Aatsitassanut periusissiaq' 2019-imiit ukiuni sisamani atuuttussa qanoq naammassiniarneqartoq? 2019 kiisa qiteqquppoq, periusissiaq ukiup aallartinneraniit atuutilersussa sulii piareersimanani. Avataaniit minnerunngitsumillu nunatsinni innuttaasunit inuussutissarsiortunillu isigineqarnitsinnut siunnerfimmillu sumik tikkuussiniarnitsinnik nalornisitsilernermik kingunerlussinnaammat aarlerinarpoq. Periusissiammi ukiuni aggersuni anguniakkatta siunnerfittalu ersarissut tunngavissinniartussaavai innuttaasuniit avataaniillu tatiginassutsitsinnik taamatullu aningaasaleerusussuseqarnermik peqataarusussuseqalernermillu pilersitsiviusussa.

Aatsitassarsiorneq ilumut sukataarullugu inerisarniarsimagutsigu aporfik pingaarnarppaaq inuussutissarsiortunit oqariartuutigineqartualersoq Inatsisartunilu partiinit amerlanerussuteqartunit aamma isumarineqartoq, tassalu suliaasaqarfiup agguluppallaarsimanerata siusinnerusukkut periuserineqartumut 'one door principium' – Suliassaqarfiup aggulunneqarpallaarunnaarnissaanut piaarnarppamik alloriartoqartariaqarpoq. Aatsitassanut Suliffeqarnermullu Naalackersuisup tamanna ukiup uuma ingerlanerani Naalackersuisunut qaqinniarlugu oqariartuutigisaraa kingullermillu pingasunngorneq 8/5-19 apeqqarissaarfigineqarami arlaleriarluni akissuteqarnermini piaartumik naammassiumaarlugu neriorsuutigisaa qaqagumita pissava? Pissangalluta Inuit Ataqtigiinniit utaqqimaarpugut oqaloqataarusullutalu takusinnaallutiguli aamma Naalackersuisut akornanni apeqqut una isumaqtigiinngissutaasoq. Oqaloqataajumagaluarluta ataqqqeqqissaarparput Naalackersuisut siulittaasuat taannaammat Naalackersuisoqarfiit qanoq aggulunnissaannik akisussaasuusoq.

Siunnersuuteqartup oqallisissiami qaqitaa soqtuginartoq soorunami Inuit Ataqtigiit oqaloqataaffigiumavaat. Avatangiiserpummi nunallu inui oqareernitsituut innarlerneqannginnissaat qulakkiigassatut siullertut isigaagut.

Arlariinnik apeqqummi qaqinneqartuni pingaarutilinnik qulakkiigassaarpugut. Inuit Ataqtigiit pisuussutitta uumaatsuuppata uumassusiliuppataluunniit annerppamik inuuniarnikkut,

suliffissaqartitsinikkut aningaasarsiornikkullu pissarsissutiginnissaat pingaartilluinnarparput. Inuiaammiuku kalaallit pisuussutaat, soorunami atorneqarpata pissarsilluarfissaat.

Aatsitassat nunatsinni qallorneqartut suliareqqeqqaarneqarnissaat tamatigut pisariaqanngitsoq Inuit Ataqatigiit isumaqarput. Taamaattorli qulakkeeqqissartuartaqarparput aatsitassap suliareqqinneqaqqaarani nunatsinniit anninneqarnerani nunatta avataani naleqarnerulersitsinikkut qanoq pissarsissutaanissaa ilisimajuassallugu. Uagummiuna pisuussutigut nunatsinnilu naleqarnerulersitsineq pissanngitsoq qinersimagutsigu taava nunatta avataani naleqarnerulersitsinissap qanoq innissaa ilisimallugu akileraartutitigut pissarsilluarnissarput naammassineqaqqaartassasoq Inuit Ataqatigiit isumaqarput. Nunarput pissuussutiminik nalilinnik naapertuuttumik pissarsisimanani atuiffiulinngisaannarli.

Siunnersuuteqartoq Peter Olsen, Inuit Ataqatigiit qutsavigeqqillugu oqallisissiaanut oqaloqataaqqinnissatsinnut ammagata oqaatigeriissavarput. Oqallinnissamut uummaarissumut qilanaarpugut.